

Früener, wänn mer i d' Berge sind:
Wa hämmer in Rucksack packt? Sägs doch gschwind!

Gschtältli, Stiigiise, Bickel und Seil
Für d'Hütte no die nötigste Teil.
Zabürschтели mit abgschnittnem Stiel,
z'esse no s'nötigscht, s'bruucht nid vill.

So simmer früener uf Hochture gange
Und mäenge hät dä Chopf lo hange:
Wie goht scho so än Achter wider?
Und bim Maschtwurf isch me au nid gschieder.
Aber öpper hät üs iibunde is Seil
Und über dä Gletscher alli broocht heil!

Früener simmer uf Turewuche vo Hütte zu Hütte
Und mängsmol hämmer ganz schö glitte.
Aber noch em Panache oder Pier oder me
Hät me vergässe wa me als Lager hät gse:
Do sind öppedie d'Müüs ome grännt
Und au sWC isch nid gsi we mes vo diham hät gkännt.

S'hät au no bsunderi Episödlі gee
Ä Neui hät wele ä elektrischi Zaabürschte uf d'Hütte nee!
Än andere hät doch i dä Taat
D'Schischue sto loo bim Billetautomat!
Villmol erinnere mir üs a die Frau
Wo zwoo Gurke mittraat hät – dänked au!
Und die wo dä Fön hät in Himeläya gnoo
Aber da macht jo nüt, dä Sherpa traat dä scho.
Äs giit au hüt no sotigi Gschichtä
Doch vo däne tömmer dänn i 25 Joor brichtä.

Aber gälled, sind schöni Ziite gsii
Mir dänked vill a die Ture debii.
Und mängsmol wämmers nomol woge
Und tönd uf Hüttewanderinge us ploge.

Und hüt, wa packed mer für üsi Ture ii?
Dä Rucksack bliibt dihaam, da isch vorbii!
In Koffer uf Rolle chasch vill me packe
Und mosch di no no bi Stäge zum Perron placke.
Aber no besser isch äs dänn mit em Auto
Chasch wa der in Sinn chunt in Koffer to.
Dänn woned mer im Hotel möglischt chic
Und um dä Tagessack z'packe bruuchts kan Trick.
Die jüngere und fitte Alte
Gönd uf dä Chlättersteig (ohni Spalte).
Anderi tönd d'Landschaft i sich ufnee
Uf flotte Wanderinge oder amene See.
Und noch dä Ture isch no Ziit

Zum Wellness isch äs im Hotel nid wiit.
Au s'Ässe isch ganz anderscht hüt
Bi däne Buffet entwickelt sich än rächte Appetit.

Jo, mir sind alli ä chli elter worde
Und tönd nüme überborde.
Trotzdem hämmers glatt und gmüetli
Au dänn wämer no no chönd uf dä Üetli.
Mer wünsched eu allne vill Freud und Sunneschi
Villicht bisch grad du binäre nöchschte Wandering debii!

Irene Enderli